

雲南水道考

雲南水運考

雲南代道

及五卷

吳興劉氏
嘉業堂刊

雲南水道考序

同里李靜軒先生本其父平齋之學爲戚鶴泉再傳弟子以嘉慶癸酉拔貢官滇中歷十餘任綽有政聲制府阮文達公令纂雲南通志書成授簡其子煥燾摹繪全省輿圖稱爲名作嘗撰萬山綱目同人刻入台州叢書續編又爲水道提綱補訂今佚不傳蓋先生歿後家遭回祿著述殘燬不完故也此雲南水道考殆亦修滇志時所作其地理之學可與顧景范胡震滄戴東原洪稚存李申耆相埒而與同郡齊息園後先輝映矣惟是邊徼山深菁密往往人迹所未經番夷譯語每易傳譌如魏默深以雅魯藏布江爲金沙江源人嘗非之黃楸林

游歷印度著書謂舊圖誤以藏江連蒲蘭布達江近年
英緬界約云大盈江卽檳榔江湄江卽瀾滄江瓦勒瓦
諦江卽大金沙江薩爾溫江卽潞江皆滇水之大者若
非親歷其源流固未易以臆決歟余從友人得先生遺
書已刻其古禮樂述入叢書後集以此編寄翰怡京卿
京卿欣然許爲刊布必將博訪周咨以賞奇而析疑也
因系數語於後闕逢攝提臘月後學楊晨

雲南水道考卷一

嘉業堂叢書

黃巖李 誠

北盤江

北盤江卽古存水水經存水出犍爲郁郅縣是也今爲貴州威寧州有二源一出大梨樹一出賜得田合流爲瓦岔河東流至雲南宣威州圍幃爲圍幃河右會得吉河水

得吉河源出宣威州西北三十里分水嶺北流經備開邨西又北流左會斷山水○斷山水源出宣威州西五十里大幞山北北流經斷山口又北流會得吉河○兩源既會東北流入瓦岔河

又東流經打廠夸都又東北流至可渡西爲可渡河又東流經可渡河橋又東流至阜衛右會阜衛河水

阜衛河源出宣威州北六十九里倘塘驛西北山爲三岔河東北流至阜衛爲阜衛河北流會可渡河

東流爲楊柳河又東流經鷓鴣山北又東爲女兒河又東入貴州界而宛溫水自西南伏流來會

宛溫水亦盤江西南源也源出宣威州南四十里束屯北流經長沖又北過龍山鋪又北爲龍津又北流至雙壩左納乾河水

乾河源出宣威州西南水洞頭東流爲歸沙河又東至箐門前爲乾河又東流經淇橋鋪南東流至雙壩

入龍津

又東北流爲宛水右納溫泉水

溫泉一名溫水塘在宣威州東南六里西流入宛水
漢地理志宛溫名縣以此

又北流左納老浦沖水

老浦沖水源出宣威州西老浦沖東南流左納費沖

水又東南流至州南右納遙坡水

遙坡水源出州西遙坡東流經廟山

北東入老浦沖水又東北入宛水

又北右納龍潭水爲龍潭河又折北左納朱屯水又北
左納何屯水又北經大屯東左納龍洞水

龍洞水源出宣威州西北龍洞東流入龍潭河

又北經以把羅南左納平川水

平川水兩源一南流一東南流至凹凹路南而合東南至以把羅南入龍潭河

折東北流爲革香河右納勺納河水

勺納河源出宣威州東八十里西北流入革香河

又東北而伏經大山數重東北出會可渡河爲盤江

盤江旣在貴州威寧州地會可渡宛溫二源又東南經普安安南二縣北境納拖長江又東南會馬軍寧谷諸河又南經安順興義兩府境又南入廣西泗城府北把蘭邨境會南盤江爲紅水江

南盤江

南盤江卽古温水水經温水出牂柯夜郎縣又東至鬱
林廣鬱縣爲鬱水又爲古豚水前漢志鬱林郡廣鬱縣
鬱水首受夜郎豚水東至四會入海過郡四行四千三
十里豚水卽温水夜郎卽今霑益州今南盤江之源出
霑益州西九十里花山洞曰交河其隔山卽車洪江也
河東流經白浪三川又東流至松林東南流經石佛停
舟有巨石如舟屹立中流又東南流經九龍山下有石
竅九水由石竅入出大谷中十餘里經天生壩層巖歷
級其第三級高數十仞中有洞曰仙人洞昔人引水分
爲二東流者稍狹流抱數山至抱覺菴而涸西流者曲
曲三十里折而東北至黑橋折而南至太平橋玉光谿

雲水考一
自東來注之

玉光谿源出霑益州東玉光邨西流入交河

又南沙河自東北來注之

沙河源出霑益州東五里高橋一名高橋河西南流
至太平橋入交河

折西南流至州城西南梅家閘而西北源臘谿南流來
會

臘谿一名阿幢河交河西北源也源出南寧縣西北三
十餘里翠峰山西盤龍山堰口北北流折東南流爲雙
河合半個煙子沖兩源東流經鳳皇山麓又東南流爲
臘谿二十餘里經阿幢鋪爲阿幢河南流至霑益州西

南梅家閘會交河交水得名以此

交河既會臘谿水又南流入南寧縣境右會白石江爲北河

白石江有兩源一出馬龍州東二十五里石崖間爲響水河東北流至馮家橋左會札海子水一爲札海子水源出馬龍州界乾海子東北流經茶亭哨至王家屯會西山河西屯河水又東北至三岔堡會三岔河水東南至馮家沖會響水河兩源既會東流至白石江橋舊東流入河嘉慶十五年改折南流至柳家壩入北河

又南流經曲靖府城東又南流至城東南瀟湘江自西

雲水考一
北來注之

瀟湘江源出馬龍州東南木容箐東北流繞勝峰山
西麓折東流經勝峰山北麓曲靖府城南過瀟湘江
橋舊東流入河乾隆十年改折南流至陶家壩入北
河

又東南流經上橋入山峽中折西南流龍潭河自東北
來注之

龍潭河源出霑益州東二十五里分水嶺東平彝縣
西四十里白水鋪西山峽中南流經曲靖府東山會
東山龍潭水又西南流至天生壩入北河
西南下天生大壩亦曰響水壩又西南趨亮子口西南

走越州下橋又西南流入陸涼州界板橋河自西北來注之

板橋河一名北澗源出陸涼州北境竹子山東南流經芳華廢縣右壩又東至郭官堡又東流至白塔東入大河

又南折西南又折而東繞古城堡折南流匯爲中埏澤中埏澤一名雲巖澤俗名東海子在龍海山麓周廣百餘里交河至此匯爲巨澤極目汪洋

折西流關上河自西北來注之

關上河一名陸涼關河源出陸涼州東北山龍潭東南流爲瀑布又東南至白鶴鋪東南入東海

雲水卷一
又西乾沖河自西北來注之

乾沖河源出陸涼州西北普山合大小乾沖竝新發邨各谿澗之水東南至三棵樹會流東經陸涼城北東南流至城東土橋東流入東海

又西流至永凝橋左納大龍潭水爲赤江河

大龍潭源出陸涼州東三十里山下一名黑龍潭西流至城南橋卽永凝橋西北流入赤江河

又西流洗馬河自西北來注之

洗馬河一名西門河源出陸涼州西北十餘里周官莊山東南流經串橋又南流經城西宏濟橋又南流至西華寺前爲洗馬河東南流達晃橋又東南流至

會津橋卽永凝橋南入赤江河

又西至雲南橋北雲南橋河自東南來注之

雲南橋河源出陸涼州南愛衛山龍泉西北流經左所壩又西北經雲南橋北入赤江河

又西西山大河自北來注之

西山大河源出馬龍州東南四十里大栗樹湯郎兩澗南流而合南入龍洞伏流硃轉如雷中成巨澤由南洞湧出南流爲龍洞河經納章邨瀉爲瀑布南流爲迤澤河又南四十五里經紅石崖至浙宗邨爲浙宗河又南流入浙宗洞一名三腳洞伏流如龍洞南出入陸涼州南流經古城東又南流至小百戶邨南